

郭襄靖公遺集

郭襄靖公遺集卷之十七

莆中 郭應聘君賓著

年友漳浦朱天球君玉編

門人泰和郭子章相奎訂

門人晉江王任重尹卿校

不肖男良翰 梓

紀事

征復古田

古田縣在桂林西百五十里重山峻嶺界於臨桂

永福義寧洛容融縣間分爲十里曰長安曰新安  
曰新興曰吉良曰仁良曰永盈曰崇良曰永安曰  
安和曰安寧又設常安桐木富祿三鎮巡檢司分  
治之景泰初居民招獐代耕日滋月蔓寔肆侵剽  
不可制服弘治五年請于

朝討之官兵進至三厄爲賊所襲副總兵馬俊叅議  
馬鉉皆遇害賊益驕恣居民皆轉徙于外僅存城  
內外三十餘家正德十五年復征之賊負險拒敵  
迄難成功兵退攻陷洛容縣治據西鄉托定洛斗

諸村嘉靖五年復征之失利殺指揮舒松等自是  
桂林地方歲遭鈔掠無敢復稱兵矣九年鎮守總  
兵官張經議立都狼各隘一十三堡募土舍莫崎  
領兵守之無何經改官土舍崎亦死兵防耗弱而  
賊愈披猖至四十三年十二月首賊常銀豹黃朝  
猛糾八寨賊樊公尚等梯越省城劫布政司庫銀  
四萬餘兩叅政黎民衷遇害變

聞副總兵都司而下各抵罪次年八月賊復越城至  
布政司守門官兵拒之不能入復至 靖邸紅門

亦被敵退督府以報

詔下所司議將興問罪之師時島夷海寇連歲爲東  
廣患兵食交訕提督吳都御史桂芳度其時未可  
輕舉遣古田守備卜禎典史廖元持文告諭之上  
四里獍聽撫請以元入縣守其地實質之也下六  
里獍逆命如故桂芳奏陞元爲本縣主簿革副總  
兵設鎮守廣西總兵官以都督同知俞大猷充之  
掛征蠻將軍印桂芳

召入譚都御史綸張都御史瀚相繼至與巡按朱御

史炳如皆以討賊事屬大猷計之大猷作討賊二  
議用兵三義指陳甚悉會海酋會一本方熾大猷  
奉東征之

命未遑也瀚因疾引退劉都御史燾代逾年亦以病  
歸隆慶三年冬

廷議以古田賊稱亂久

天討所必加然非廣西特設重臣無以任是役南贛  
張都御史紳殷少卿從儉劉御史思賢皆以棄梓  
憂條具討賊計

莊皇帝毅然行之殷都御史正茂以廷臣薦首膺是命畀節鉞得專征伐發內帑金四萬兩供兵興之需正茂以四年四月至桂林開府總督李都御史遷亦以是月至蒼梧時獻議者言人人殊有道謀之惑正茂下諸司議以左布政使郭應聘官粵久尤心屬之且示之曰諸夷梗化曠誅滅此朝食固矣然蜂螳之衆莫可勝窮從而別之以示吾不殺之仁亦兵法携其交之義也且今日之師主於聲罪若豹若猛則名捕之雄也誠先獲之卽餘醜

不盡芟蘓足以伸

天憲矣夫兵猶火也不戢將自焚况公私交匱之日  
乎其母持火蹈費留之戒而遺乏絕憂惟諸君圖  
之聘等曰敢不惟命聘迺偕大猷等別勦撫之宜  
定屯守之策分析條縷繪爲圖以進復詣督府議  
合正茂乃會遷疏陳可取狀

上從之徵諸路土漢兵凡十四萬人分爲七道以副  
總兵門崇文將南丹下雷諸兵由永福抵總甫隘  
副使邵惟中監之都指揮錢鳳翔將思明那地諸



兵由兩江抵都狼隘副使應存卓監之左參將黃  
應甲右參將王世科將鎮安向武東蘭田州諸兵  
由洛容抵三門龍坑二隘副使鄭一龍監之遊擊  
將軍丁山都指揮董龍原任都指揮魯國賢將泗  
城歸順龍英江州諸兵由融縣抵思管風門蓮塘  
二隘參議龔大器監之原任參將盧錡梁高領募  
卒三千人備策應征蠻將軍俞大猷總其師右參  
政柴涑司糧賞僉事金柱司察紀左布政使郭應  
聘則綜司兵餉也大猷度諸兵將集遣把總王綱

領募卒分屯牛河三厄以扼要害通轉輸大猷繼  
之入縣城中各路官兵俱以十二月初一日並進  
連破東山鳳凰大巖澗水淶里古城數十巢俘斬  
甚衆賊勢潰奔合潮水巢據其極巔五年正月正  
茂檄大猷統諸路兵合擊之賊殊死鬪相持十餘  
日未下大猷陽分兵擊馬浪諸巢而屬王世科督  
兵守之世科以安隆死士耶盧等三十人乘雨夜  
出賊不意援伏山嶺黎明銃發賊衆驚潰泗城諸  
兵援而上賊墮崖崩壑無噍類者馬浪諸巢相繼

俱下大猷復分兵擊碎江金寶頂涼境天井理定  
南鄉諸賊以三月初一日班師九擒斬首從賊七  
千三百有奇餘黨撫定捷

聞上心大悅晉遷秩右都御史正茂兵部右侍郎廕  
一子入監讀書大猷陞二級應聘陞俸一級賜鎡  
幣甚厚餘各陞賞有差先是正茂慮豹猛二酋越  
逸懸千金購之官兵未進主簿廖元把總王綱用  
撞人黃金線等誘斬黃朝猛首以獻銀豹度不免  
欲偽爲首級以誑搜捕計令常良臺誘撞人狀貌

類已者得莫諫成至其家飲醉之取其首以豹常  
戴黑猿皮帽及所佩刀解於廖元王綱元等信之  
以報一時人心咸大快之未幾有言常首非真者  
正茂曰人臣之義以不欺爲先常首誠在何惜數  
千金購之購之而獲報今之功認前之罪何所不  
可若檄金柱門崇文及知縣唐執中密捕之閱數  
日銀豹之兄銀站及其隣廖東貴聽執中等計生  
擒銀豹解之正茂躍然曰吾今得明目洗心於光  
天之下矣卽伏辜所甘心也乃爲章自劾而論柱

等功械送銀豹至

闕下瘳于市督撫二臣用前議奏定東蘭南丹那地  
三土州官族常顯忠羅永山莫羅領常安桐木富  
祿三鎮土巡檢職事世守其地立古田守禦千戶  
所陞古田縣爲永寧州以知縣唐執中任之設兵  
備叅將各一員後有常狼要者銀豹族也其人狡  
黠甚方大征時與其親族匿洛容托定洛斗永福  
邊山諸巢久之復回上宋之馬嶺不服土司鈐束  
陰糾黨與時爲報復謀有獐人黃銀成者土司納

其女爲婢往來親密狼要以爲異已讎而殺之掠其妻子牛馬遂率衆叛糾洛求諸賊以數千計攻圍營堡據阻江道陽朔碎江柳城上油賊皆應之爲變叵測時方大舉懷遠師都御史郭應聘檄兵備副使莊國禎撫其從亂諸黨惟狼要罪不宥購以重賞狼要懼與其黨數人遁右江五都哨守官徐民瞻伏兵執之其黨奔回復熾合洛容賊潛入其縣襲殺典史謝漳奪其印而去應聘聞之行總兵官李錫移懷遠征師東蘭南丹兵委叅將王瑞

領之副使莊國禎監其軍大破古底上宋諸巢擒  
斬一千六百有奇俘獲稱是時萬曆二年三月也  
餘黨乞招悉聽編甲輸稅闕荆榛通道路獍童就  
社學者數十人今永寧城內時聞絃頌之聲云

論曰古田旣平改三鎮爲土巡檢司以下六里分  
隸之得以狼制獍之法矣但狼貪無厭獍猶難馴  
往往因之召釁上宋之亂厥有由哉議者遂以用  
狼爲非策是未免於因噎而廢食矣實鎮兵之防  
嚴剗削之禁是抹敝之先務也猶有難焉者縣民

轉徙于外者無慮數千人其得復業者無幾也今  
愬者紛至欲舉上四里之衆而驅之夫驅僮安民  
名正義順長民者孰無是心然業已安之而復驅  
之恐新附之衆未易猝移而久徙之民並失其業  
長民者之心大有所不得已者矣後之當事者審  
諸

討平府江

府江平樂府地也上起陽朔下達昭平綿亘三百  
餘里巖谷奧深灘瀧洶湧兩岸諸僮依憑險阻出



沒剽劫自昔患之而又以朦朧三崗僊迴高天水  
澹諸巢爲之根抵羽翼黨與煽結莫可誰何成化  
正德間韓都御史雍陳都御史金先後討平之百  
十數年來根株蔓引生齒益夥跳梁復如故隆慶  
改元總督譚都御史綸檄總兵官俞大猷畫進討  
計會綸被

召入事遂寢逾年三崗賊攻荔浦縣城破莫大嘉等  
堡古架等村兵民遭殺戮無算西岸僊迴諸賊圍  
永安州城復于山灣執知州楊惟執并掠其印入

巢要厚贖始得出當是時道途梗塞城門晝閉永安脩荔幾至陸沉岌岌乎不可爲矣庚午冬古田師興議者曰府江兩粵咽喉患與古田等宜借兵威并及之殷都御史正茂是其議迨師旋則五年三月也春深水漲時已不可圖矣彪灘龍頭磯諸賊益肆虜指揮胡潮千戶李可久殺死千戶周濂土舍岑文諸傷人斃貨狀不可枚舉事聞兵備副使陳其樂坐貶官是秋正茂遷總督郭應聘代巡撫事正茂過府江嘆曰蠢爾異類所謂仁弗能懷

威弗能讐者也與聘決計討之會東寇方棘遂以屬聘時議者有謂兩岸疊嶂層巒人跡罕到卽嚮道間諜舉無所施而朦朧三崗賊衆且悍欲一鼓并之似非計之得者聘曰三崗者兩岸逋逃藪也舉兩岸而不及三崗是窺門戶而舍堂奧也况崗賊之虐更熾乎又謂東岸徭寇不滿二千而十三屯民賊數爲富賀擾宜并及之聘曰富賀之有十三屯以障諸徭也舉兩岸而復及十三屯是驅狼虎而自撤藩籬也况屯賊之惡未著乎分巡副使

劉穩兵備副使鄭茂與聘議偕先後以狀白軍門  
聘遂會正茂及李御史良臣言于

上曰惟粵西夷獠所在克斥頃古田旣復

國威大伸諸夷稍知斂戢其有恃險負固者臣等多  
方招諭許以自新誠仰體

朝廷好生之德毋敢勤民召釁爲也惟是府江兩岸  
三崗怙險稔惡禍元元而厯

天子肝食不急擊將爲地方憂徒用列艦陳師捐餉  
數萬無益也疏下本兵議 報曰可乃奉

詔徵漢土官兵六萬員名水陸分爲四哨西岸及水  
哨以都指揮王承恩董龍統其軍副使鄭茂監之  
三崗哨以叅將王世科統其軍副使金柱監之東  
岸哨以叅將錢鳳翔統其軍僉事夏道南監之總  
兵官都督同知李錫總諸軍事督餉則左叅政胡  
直紀功則副使龔大器劉廷舉也以六年十月十  
五日進師三崗兵連克古西巖口木魚靛諸巢  
西岸水哨兵克太平古冒馬尾彪灘僊迴諸巢東  
岸兵克黃崗古摺水滙河冲諸巢賊勢大敗三崗

賊潰入南源雞籠山東蘭永順兵分道邀擊大破  
之高天巢賊乘險拒敵我兵弗能克泗城兵潛登  
絕頂舉銳號諸兵齊登覆其下東岸賊遁匿苦竹  
蒲巖龍英田州兵用火攻盡殲之無得脫者凡擒  
斬首從賊五千一百有奇俘獲四千餘名口牛馬  
器仗稱是以萬曆元年正月二十日頒師捷上

聖心嘉悅正茂賞銀五十兩紵絲二表裏應聘陞俸  
一級廕一子入監讀書錫陞實職二級各賞銀三  
十兩紵絲二表裏諸文武吏士陞賞有差役凡三

閱月費餉僅二萬計事平聘檄布政使楊成按察使高察偕茂等議善後策疏爲六事上之一曰改設土司夫欲弭盜源先據要害今荔浦之峯門南源脩仁之麗壁市永安之古眉各巡檢司皆久沒于賊宜悉革罷易爲土司一移東岸營于水漣募兵二千人分屯平嶺僊家冲諸田一移西岸營于僊迴高天龍頭磯募兵二千人分屯六內六章馬尾黃牛諸田一移上崗營于古西募兵千六百人分屯峯門大喃諸田一移下崗兼轄西岸營于東

線募兵千人分屯大宅東瓦諸田仍復廣運足灘  
二堡以重巡緝土司于兵領中擇有才勇者充其  
職事俾世守焉其不効者更置之二曰更設叅將  
夫控要害置土司分兵屯守不有將領以統之何  
以整齊約束重示彈壓也昭平舊有坐鎮都指揮  
一人第事權稍輕遷代靡一宜改設叅將兼制桂  
平允兩岸三崗諸土司盡以屬之練兵簡衆戢夷  
防奸其有獷得不逞者得相機勦不爲遙制三  
曰開通水陸向者諸獍占據道路榛莽今蕩平之



後宜開山通道荒拓險阻西岸自昭平明源崗以  
達僊迴自僊迴達古蘇永安自藤灣達馬尾象磯  
自象磯達田冲龍頭磯抵府治東岸自昭平里步  
以達水滸自水滸達平西羅山及十三屯自羅山  
舊途達府治而又于沿江開縉道以便舟挽募商  
伐木恣其採取俾鼠潛蟻附者無所容而風氣亦  
因以漸闢四曰酌處兵費二崗兩岸設官營堡屯  
卒幾七千人鹽米之需入月給三錢屯種建築諸  
費不與焉初年約二萬有奇梧鎮司府之藏調節

而均給之次年墾田所出足以自養止勿給五日  
預定縣治府江距蒼梧五百里許中間山谷窈窕  
林菁蔽虧片影孤帆行同異域稽之故牒唐宋時  
設龍平思勤馬江沙亭數縣後胥爲夷占沒今昭  
平卽古龍平地也江之西潯夷衍寬平風氣攸聚  
宜卽其地創一縣治以平樂之昭平馬江二里富  
川之二五都賀縣之招賢鄉上下半里割而益之  
總其賦得三千六百有奇而僊廻諸田稅盡以屬  
之六曰處分田糧兩岸二崗諸區覈賊遺田計四

十萬畝有奇舊屬平樂荔浦永安者令民復業輸徭賦如故各土司屯種者人給田十畝兵領加給有差授田之初養以月糧資以牛種三年之後計畝科糧三升蠲其徭差者爲例疏入

詔皆從之乃設叅將官于昭平以都指揮王承恩任之其各土司官上中崗屬之名色把總齊覲領田一萬三千八百八十畝有奇設堡凡幾下崗屬之土舍覃文舉領田八千六百六十畝有奇設堡凡幾東岸屬之土族岑仁領田一萬五千二百畝有

奇設堡凡幾西岸龍頭磯諸兵領田五千一百九十畝有奇設堡凡幾僊迴諸兵領田八千二百六十畝有奇設堡凡幾永安高天古帶諸兵領田二千二百畝有奇設堡凡幾各畫地分界事版築業耕鋤爲持久計通道設縣諸務將次第舉焉是年冬陽朔碎江賊廖金濫等起南源殘孽復逞陰助之突入土舍莫棟營奪之佯以招告復分精銳合金馬沙田賊襲古西岩口傷堡兵十餘人并據峰門大寨叅將王承恩率兵遇于青龍隘轉戰數合

斬首十餘級賊稍却復奔據山灣而榕崗喇崙六  
窠等巢與三崗楊玄昌諸賊附焉兵備副使徐作  
以報聘發向武兵援之會賊圍張村急王承恩曰  
山灣永安咽喉也賊舍南源而據山灣是無永安  
矣勢可緩耶亟引兵分二道一由古西一由石門  
進賊聞之遁我兵追及賊勢窮殊死戰千戶張世  
勳勇敢士也衝鋒手刃三賊被創死各兵斬級二  
千餘顆奪復峰門賊仍據守山灣勢益衆軍門復  
檄叅將王瑞守備凌文明統田州兵二千人募卒

六百人偕向武兵合擊之遂破山灣巢賊據險接  
刃王瑞部兵奮死仰戰殺賊二十餘人乃大奔潰  
山菁間各兵乘勝追擊斬首一百三十餘級南源  
江帶賊震計圖自全其酋周公樓等願自縛詣降  
乞還故土投都鳳安寨老常公導等保領求輸稅  
爲編戶副使徐作白軍門許之悉從安插復業者  
百四十人移莫棟兵于山灣分屯上下章上下潘  
村諸田據永安扼塞守之榕崗諸巢先以破山灣  
驚遁兵旣散乃漸歸故穴不復疑貳永安知州廖

憲言于作曰永安諸賊盤結山谷不可勝誅惟榕  
崗一巢賊雖少而悍倚險自固患在肘腋適今不  
舉後難圖矣作授計于憲以二年四月密遣百戶  
蘇勝宗總目覃滿率兵搗之擒斬五十餘級鮮得  
脫者遂以滿領其田屯兵百人耕守之喇崙六窠  
諸巢一時皆屏伏八月上中崗獐酋楊玄昌王扶  
忠王公來等相率投招願輸糧編戶還西喃黃村  
老鴉黃泥諸田自此府江孤舟夜渡單騎徑馳而  
永安修葺之民臥始帖席云

論曰府江蓋百粵之孔道也諸猺占據爲梗吏民商旅視爲畏途卽縉紳亦橫被慘酷今三烈墓在昭平望之愴然興慨

天威震疊一旦廓清足以快神人懾遐邇矣顧尤有慮者蜂螳之羣不可數也梟獍之性不可馴也此患在外者也土司利田之廣而戍額多虧哨堡玩寇之微而兵防易懈撫安之官目眈保之排年又從而漁獵之其端雖細而禍機伏焉此患在內者也內患除則外患弭矣監司勤經畧而詰久逋之



奸守將勤巡緝而杜未萌之釁地方尚亦有賴哉  
征復懷遠

懷遠故牂牁地也與湖貴靖黎諸州接壤徭獞狔  
狔蟠據山谷最繁又最悍耐殺喜鬪負重綿鐵甲  
人弩長鏢鳴金鼓列陣進止諸夷號爲黑徭宋元  
以來叛服靡一

明興命征南將軍吳良總大兵征五溪蠻由懷遠入  
徭懼請降因割融縣金鷄鄉益之列四鎮置縣治  
于潯江溶江之匯顧地形崎嶇弗稱附郭左右徭

環居之三甲編民遠處諸徭外而徇獠又邇徭以  
居素畏徭強瞬息向背無固志成化以後侵入融  
縣板江諸村據之當事者以賊勁費鉅兵興爲難  
久置弗問嘉靖丙午知府江滿乘馬平征師之便  
請于督府自將征之諸徭屯大稜嶺郡鄧山以拒  
我師失利而還勢益張甚丁未環攻縣城縣官懷  
印出匿廂民俱星散自是城郭丘墟無一旅之寄  
而三甲遺民僅延喘息縣官惟僑居府城以冠帶  
生員楊官名色鎮撫朱萬世百戶任邦祚分地撫

處遙示羈縻而已隆慶辛未春古田克復以兵威

戢諸徭咸聽命願內屬知縣馬希武迺入其地撫

之遂議復城縣興版築計傭作日夜督率甚謹有

怠者輒鞭之徭以不平愬者盡罰不少貸民徭子

斃杖下者二人諸徭情大拂怨詈日積武又疑宦

世兩人與賊合議令世巡上江宦巡下江實踈之

也兩人心益離不爲用壬申八月三日諸徭嘯聚

二千餘人殺武及管工官經歷俞冕等五人變聞

詔討之時方有府江之役總督殷都御史正茂巡撫

郭都御史應聘議曰諸狴稔惡法無赦然令寔激  
之也今日之舉止于聲罪宜卽征師選鋒向之苟  
獲其渠魁伸威雪憤足矣狐鼠輩寧盡殲耶萬曆  
元年正月檄總兵官李錫挑土兵精銳二萬人叅  
將王世科錢鳳翔督率以進屯板江錫屯長安鎮  
會大雨雪連旬樵蘇不繼士馬凍甚土官兵無鬪  
志告息兵期至秋復出願効死力兵備副使沈子  
木以報乃遣歸而益兵屯長安鎮越數日賊出寇  
融之崗頭村把總王鸞督烏銃新兵遏之擒斬三

十餘人賊始退錫言曰兵之不進固天時亦天意也賊恃鐵甲強非廣募浙兵莫可制又黨與以數萬計安所分別之宜用浙兵若干人廣兵若干人湖兵若干人備衝擊土兵若干人備搜爬置戰艦若干艘分水陸進斯爲全計聘曰兵法以全取勝竊聞之矣惟是粵西歲入素嗇物力方疲狼兵十人之食始當浙兵一卽募浙兵萬人餉非十萬不可矧諸路兵又倍此耶且夷獠素畏狼兵今以狼盡不足恃恐諸夷聞之生侮心矣不携徒黨是益

敵也不酌機宜是自疲也願熟圖之乃檄諸司議以近縣近江諸巢爲必勦之寇黃土諸洞白杲諸獍青淇大梅諸獍悉從安撫用浙兵千三百人廣兵千八百人鈎刀兵三千人土兵十萬人及造舟梁繕器具儲糧糗各以職分理咸備會殷都御史正茂唐御史鍊疏聞于

朝詔報可悉聽臣聘便宜不從中制聘奉

命徵諸路兵移文湖廣趙都御史賢貴州蔡都御史文各飭兵備邊遣朱萬世從間道入三甲及古龍

北泉靖州衛千戶翟廷鸞入都天黃土原任主簿  
李材入長沙大梅青淇諸巢鎮撫各夷俾毋首鼠  
願立功自効者如格重賞於是諸矜狗獾未黨狂  
者咸願出兵內助圖自完而應勦諸惡若勢寢孤  
已在我掌股間矣十一月初旬諸路兵集聘乃申  
明軍令刊布諸將吏懸示賞格有不用命者悉如  
軍法從事諸將吏唯唯乃以叅將王世科領縣北  
哨統募兵二營士兵九千名以都指揮楊照領縣  
南哨統募兵二營士兵七千五百人以叅將錢鳳

翔領坡頭哨統募兵二營土兵一萬二千名都指  
揮戚維善領西路田寨哨統募兵一百人土兵一  
千三百人聽坡頭哨兼督以原任參將亦孔昭領  
板江哨統募兵二營土兵七千九百名以原任參  
將魯國賢往靖州統鈎刀兵而總兵錫督募兵四  
營土兵一千人戰艦四百艘爲水哨并總陸戰事  
度地遠近先後督發期以十二月初四日各抵信  
地又分遏截六哨防越逸江運一哨護糧餉參議  
李文續司督運副使莊國禎司紀功而監軍督理



則悉屬之兵備沈子木也十二月初二日至長安  
鎮王世科楊照兵先發偵知諸賊屯聚板江樨大  
洲四面列艇恃五灘自固樹柵累石以拒舟師初  
三日水兵進至四維江止營錫發把總金仲伯督  
五兵船授令暗伏江口薄暮賊艇數百蔽江下欲  
衝營伏兵寂然按號發鏡諸營兵亦盡寂無聲賊  
驚奔還洲吶噉搗鼓徹曙我兵屹不爲動初四日  
辰錫麾下雷等兵登岸趨賊洲督金仲伯王鸞施  
有叙兵泝流砍柵毀固而進亦孔昭錢鳳翔兵以

次至賊夜劔膽落晨見官兵水陸雲集知勢不敵  
疾棹向軍聽潭遁舟師奮力追之賊艇覆溺無算  
次日盡發諸兵分山撲勦連破丹竹潘營同樓竹  
瓦火燒合水諸巢東岸賊懼俱西遯期併力致死  
初九日聚衆數千于楓木大山前阻陡澗鼓噪來  
衝行列白盾如墻而進我兵開營鼓士雙櫻其前  
左哨把總李存忠兵衝其腹右哨把總王槐兵沿  
澗直薄其後賊遂大潰棄金鼓甲冑越大稜嶺走  
官兵盡搗田寨楊崗諸巢追至縣治十五日王世

科報遁賊北渡潯江合太平河里諸賊集天鷲嶺  
錫乃以水兵截潯江督諸路兵結舟盡渡分哨前  
進王世科率南丹兵先過江抵南寨賊從天鷲嶺  
來衝指揮江濬兵奮趨擊之梟被甲束帶首二人  
賊大敗奔聚腮江獨崗間十九日官兵乘勝追擊  
搗太平河里連破慘口蓬葉三轉腮江巴崗猛圍  
七團諸巢直抵靖州界擒斬甚衆正月初七日魯  
國賢統湖兵至進勦諫冲及大藍公和諸寨時天  
鷲嶺之北賊已畧盡會錢鳳翔報杲黃大地賊聚

郡鄧山勢張甚聘會錫量留兵縣北營故地盡移  
諸兵與坡頭縣南兵分道夾擊復大破之俘獲甚  
衆十六日諸兵追逸賊望一大巢長亘數里崖壁  
峭絕以合圍大木列爲重柵詢之樵獍云上獍籠  
七寨也諸獍稱曰獍官獍王急則入窟其地官兵  
度日暮分屯近山次日江濬兵從間道繞賊後金  
仲伯路秉忠兵從中路施有敘王鸞張左右翼而  
進緣草仰攻諸土兵繼之賊殊死鬪男婦悉出鏢  
弩矢石如雨下有數婦裸體楊箕擲牛羊犬首爲

厭勝術自己至申官兵以死決戰砍柵直上土兵  
乘勢大呼而入四面舉火煙焰蔽天賊大敗潰梟  
斬賊級及燒死者無算獲懷遠官錫牌及演禽決  
戰妖書知爲猺魁三窟也是戰我兵多負重傷把  
總石密哨官常希官隊兵莊法旺等死事數十人  
然窮窟逋數根株悉拔矣諸猺餘黨逃匿上下猺  
籠者李材督已梅猺擒斬六十餘人其匿上下黎  
者錫遣謀者悉諭降之乃議旋師移洛容討賊以  
王世科留屯善後時二年二月十五日也虜破巢

一百四十餘獻馘三千五百四十二俘童穉一千  
名口獲牛馬噐仗五千有奇降其衆五百餘人捷  
上

賜正茂應聘錫白金綵幣聘陞俸一級餘將士陞賞  
有差先是諸獯恃衆且猛又據上游謂官兵必不  
能深入至是傾巢掃穴惡孽盡殲其喙息僅存者  
以饑疫死復七八成相顧錯愕曰吾今而後始知  
天威之不可犯也乞降者踵至願供獯賦守扼塞子  
木乃籍其名數編爲保甲悉遣還復業有蒙珣傳

者向以通妖書善雜卜術爲古田賊魁常銀豹師  
聞大征遁歸橫嶺時糾黨侵掠湖境湖人懸二百  
金購之不能得僂官之變皆珣傳導之及征師入  
又以先匿免至是徭目吳金朝訶知傳所在報李  
材曰傳實倡亂賊也可竟容漏網乎計同平冒村  
徭縛之磔于市陂頭塘窟徭執賊首楊洪倉男弟  
加弟悞郎以獻其畏威悔禍如此聘復用子木議  
會殷都御史正茂唐御史鍊條計懷求善後合十  
事上之其議懷遠者四一曰移設縣治懷遠舊治

環諸徭中四顧榛莽無所恃守惟程村則附殘民  
板江則隣融界圖存之計宜擇于斯二者二曰聯  
東民徭諸孽值斬艾之後帖然歸順非有羈繫曷  
保其終宜以太平河里四港諸孽屬之三甲猛團  
七團諸孽屬之武洛洞桐木合水三門諸孽屬之  
白果獐武生朱應賜統之郡鄧坡頭杲黃大地諸  
孽屬之土舍常昌金主簿李材統之邊田板江諸  
孽屬之浪溪寶江良獐千戶羅大本統之河潺蕉  
花諸孽屬之背江良獐百戶任邦祚統之庶幾聯



絡勢成不敢復萌異志三曰選立社師懷之遺黎  
久已淪陷誠夷之將終于夷矣宜干三甲立社師  
教之殘民子弟稍習知禮讓有能通文義者錄充  
弟子員裨速見爲善之利四曰慎固兵防善後之  
策要在足兵屯戍之謀先于扼險懷遠視板江猶  
門戶然宜即其地屯兵五百人以把總王鸞領之  
仍給之告身責其終効庶幾肩鑰旣固水陸咸資  
疏入

詔悉從之下所司次第行焉今諸猺屏伏遠邇諸洞

落皆喁喁嚮風南蠻自此可不復反矣是役也布  
政使楊成按察使高察吳一介叅政鄭茂僉事夏  
道南知府許嶽彭文質皆贊決大計與有勞勩云  
論曰懷狴獷悍爲諸夷寇衆皆爲是役危之

廟堂特董南顧許以一切便宜誠重之也卽徵兵選  
將而道議紛然當其時機事一移豈直盛時有不  
討之賊而右江士民有寧宇耶聘乃力破羣疑不  
復顧却此時之心死生以之矣遑恤其他賴天之  
靈宗社之福羣醜卒就芟夷伸

主威而攄民惠是豈人謀所能與哉痛定思痛不能  
不爲潛然猶竊有慮者夷性鷙悍狼貪難安易動  
寬之則跳梁無忌急之則忿厲不堪即今殘民復  
業者奪牛而蹊其田奸商負販者射利而挑其釁  
田賦雖覈而取盈則懟城築方興而力役則勞惟  
監司寬文法緩督責治其爭奪時其貿易威讜而  
惠懷之即百年可無事也圖惟厥終者尚慎旃哉

郭襄靖公遺集卷之十八

莆中 郭應聘君賓著

年友漳浦朱天球君玉編

門人泰和郭子章相奎訂

門人晉江王任重尹卿校

不肖男良翰 梓

紀事

平洛容蠻

洛容縣治故在洛清鄉之白龍岩天順間燬于賊

邑民奔米崗居之後卽石山之麓麓爲垣湫隘幽  
陰甚弗稱距古田常安鎮僅隔一水正德末古田  
賊攻破之遂據西鄉托定洛斗諸村嘉靖初草創  
脩復城中僅有茅屋百十間募卒殘民居之而官  
吏皆僑居柳郡遙示約束隆慶庚午大舉古田師  
洛爲兵馬糧糗必集之地掌縣事知州余涵始創  
公宇一所其廳事猶草苫也時古田賊多遁洛斗  
及附縣諸村當事者議并加兵以紓洛人患有老  
人莫止等素與賊善爲通官府意旨賊懼投止等

賂涵爲請于軍門得逋誅先是賊妻子禾畜半匿  
城中止等乘兵威脅之邀厚利及兵退求償弗獲  
始與縣民爲讎矣無何涵轉官知縣邵廷臣來代  
知賊意反側懷旦夕憂議復縣城于白龍岩避之  
從民願也計建築費用金四千六百有奇守巡官  
以役鉅費艱議久未決廷臣旋以憂去諸賊糾永  
寧遺孽常狼戛等時時嘯誨愈益無忌萬曆元年  
又舉懷遠師都御史郭應聘深以城守單弱爲虞  
檄守巡官摘上林縣練兵一百名協哨兵守之賊

稍戢典史謝漳者委護縣印酒酣嘗語人曰諸賊  
患在臥榻不乘此時奔及之洛可常有耶賊聞之  
懼適一商販陶至獐村獐爭取之弗酬其值商以  
訴漳漳執二獐罪而繫之賊益憤日構常黨及永  
福理定柳城上油諸賊爲執質挾撫計會上林兵  
糧乏逃歸哨守指揮朱昌胤稚弱不振守兵弛不  
爲備賊覘知以二年正月八日夜五鼓數十人從  
隙垣緣入先釋二獐急趨漳所掠其印而出漳拒  
之力不敵遂遇害兵民被殺傷者十三人昌胤等

始覺追至長安鎮土巡檢常顯忠率兵援之共斬  
獲一百三十七級賊稍却仍嘯聚山隘聲言占據  
縣城報至時懷遠賊已大破聘集諸司畫順勦策  
議者謂洛容與古田永福柳城諸州邑比壤巢窟  
星羅勢共犄角事體重大須報

聞然後加兵且懷遠諸師摧堅陷陣已兩閱月所謂  
強弩之末者也聘曰諸君議是顧賊張甚勢若燎  
原

君門萬里待報而舉則橫潰決裂莫可救藥矣苟可



除兇雪憤專兵之罪其實甘心兵法不云乎先聲  
奪人懷<sub>心</sub>狴爲羣夷望狴破則諸賊心膽落矣我師  
乘勝勢若破竹何賊之敢抗况回兵順剿餉不加  
多粵西瘠嗇之區寧能再堪徵發耶諸司僉曰誠  
如公算遂會總督殷都御史正茂巡按唐御史鍊  
檄總兵官李錫刻日移師先期檄永寧參將王瑞  
守備康仁督田州都康土兵防遏之賊方窺常安  
鎮瑞等率兵奮擊生擒首賊單狼印俘馘一百七  
十三人賊始懼各遁歸巢會移兵將至托定賊獻

還所掠印求免加兵聘曰諸賊流毒有年卽無近  
事法且不宥今我兵壓境乃欲以獻印緩誅乎兵  
退且復逞其謂之何乃分兵爲四大哨一由洛容  
一由永福一由永寧一由柳城各哨功次語具載  
別紀中而洛容又分五路以原任叅將亦孔昭統  
之守備金策領那地兵抵西鄉金崗諸巢指揮孫  
管馬迅領恩恩龍州兵抵崗門金田諸巢都指揮  
韓文啓領下雷湖閩兵抵金崗前指揮干碧領那  
地兵抵福祿巢後又以指揮苗振邦百戶岳喬領

遷隆上腴兵遏截三板橋東泉堡諸路總兵官李錫領舟師屯理定江調度諸軍事副使沈子木監之而理餉紀功仍屬之叅議李文續副使莊國禎以二月二十五日會師合擊連破托定洛斗金崗古龍黃塘諸巢擒斬首賊陶浪金陶浪漢羅道章陶金總及從賊一百一十三名顆次日復克李伏崗門川岩諸巢擒斬首從賊羅顯楊覃明威等二百八十二名顆賊大崩潰奔遯元高比寨諸岩崗間孔昭督諸兵追擊復擒斬首從賊羅金桶等二

百五十七名顛倖獲賊屬三百有奇牛馬噐仗稱  
是時靈雨大作諸孽患苦甚日干山巔號泣請降  
乞餘生聘聞之曰神人之憤雪矣休兵息民以事  
東作茲其時也下令諸路以三月十五日班師孔  
昭降其衆數百人籍其丁口編爲甲五分屯阨塞  
一守橋鄧隘一守都勒隘一守平徑隘復用守巡  
官議于三板橋設堡一屯土兵百人覈賊遺田九  
百二十五畝給之耕守仍屬守備金策往來提調  
之事寧合永寧永福柳城諸路凡獲級四千五百

有奇聘會總督殷都御史正茂馳狀通論吏士功  
罪

上之

聖心大悅

詔曰這獍寇討平地方底寧明係諸臣之功聘先賞  
銀三十兩紵絲二表裏錫二十兩紵絲一表裏餘  
俟勘明具奏是年閏十二月巡按李御史采菲覈  
實以報奉

旨正茂陞兵部尚書兼右副都御史應聘陞兵部右

侍郎兼右僉都御史總督巡撫如舊錫陞職三級  
加賜金幣餘將吏各陞賞有差蓋異數云

論曰洛容諸獍驤屑一隅非懷遠勁悍古田占據  
埒也顧密邇內地不西連古田則北結懷遠往往  
吞食吾民爲柳洛道梗諸蠻恃以向背故遠之可  
憂未若近之可憂之甚也幸而乘利席勝收功旬  
日免再調發以重爲一方元元困豈非天厭其惡  
國威遐邇而致然歟雖然王公設險城郭爲要洛城  
之不足恃非直卑隘也岡巒礙日居者難安蛇豕

環城守者易懈圖存之計在于遷邑令之言詳矣  
顧以時詘舉羸姑有待耳後之當事者毋狃目睫  
而忘棄土可也

平上油崗

上油崗者故柳城縣地也賊黨占據者二曰上油  
曰下油總名曰上油崗恃險負固柳城四鄉賊咸  
以爲歸而洛容之金崗馬平之五都古田之古底  
上宋諸巢共爲聯絡往時古田賊敢于稱亂者恃  
此爲通往來匿流聚益其聲援耳故上油視諸賊

近稱淵數云萬曆二年春將有事洛容副使沈子木議弁及之都御史郭應聘聞上油險惡稱最未易卒拔又慮兵分勢弱也戒勿進子木復言曰洛容之變尚賊實與焉置弗問洛賊將盡匿此中矣此輩爲柳民患獨一朝耶請急擊勿失應聘許之遂自懷遠移泗城歸順諸兵及募兵一營統以都指揮楊照分爲四路一由里廂堡抵上油指揮陳良璧領之一由里廂堡抵下油指揮高惟孝領之一由界牌堡抵思的田尾指揮戚繼善領之一由



青鳥屯抵黃泥馬安千戶王堯臣領之與洛容永  
寧永福諸師剋期同進連破板橋姚崗青鳥白羊  
黃泥新皂常安蒲岩諸巢兵威大振俘斬首從賊  
級四百六十有奇各賊散遁匿里廂下良安勞白  
馬四岩官兵奮力攻之白馬岩破惟里廂下良共  
一山相通約長數里許中寬而曲水石各半賊蓄  
聚甚夥謂我兵不能窺也兵初進緣石磴捫蘿而  
上上盡復乘竹筏由水潭入潭深莫測淺者亦數  
丈乃于筏上架雲梯升崖峭壁欽岑窅杳非握炬

不能一移足賊從暗中見火光卽矢石亂下安勞  
岩不及里廂之半而崎嶇亦畧相當諸兵分圍岩  
口相顧駭愕累日莫敢進子木與照奉軍門檄懸  
賞勵諸兵兵益憤照親負弩矢督之先令作長炬  
數十載竹筏上推入岩口畧窺路徑次日選敢死  
士出賊不意于黑處乘筏架梯緣岩而上賊一聞  
狼兵聲悉驚潰投潭中溺死無算而安勞岩亦相  
繼披靡復擒斬首從賊三百五十有奇獲賊屬牛  
馬器仗稱是乃合洛求諸哨同日班師知縣余光

裕撫其餘黨降之周王廖莫覃五大姓夷復歸版籍矣得賊遺田議復安勞堡募兵八十名給田糧五十餘石耕守之又募足里廂堡兵一百二十名分其半于境村立堡以頭目莫希顏及其子顯學分領之給遺田得禾一十二萬八千六百九十餘把以充兵食三年之後始科賦役著爲例云

論曰柳城之民歲苦寇攘甚矣固山谷險阨足恃亦逋逃淵藪爲之左右耳撞侵吾民膏腴徃徃托跡豪右圖自完歲輸私租不共公賦恣其吞噬莫

可誰何官司索急輒以佃丁庇之甚者保納舍藏  
無復顧忌賊焰益熾則賦益虧胸而閭里生計索  
然矣皮之不存毛將安傅彼爲是者獨何心哉洛  
容馬平之患胥坐此至有舉十數巢落而附于一  
門者嗚呼子視盜賊讎視吾民律以漢法宜何如  
坐也故先王之制治內詳而治外略安得如郵鴈  
門寧內史其人者而與之便宜耶

平陽朔金寶嶺

陽朔南連恭荔北界臨永民夷錯居崇富廣和永

寧各里盡被猺獞侵據而金寶嶺尤爲淵藪其種  
本古田流出號胡北獞負固流毒百有餘年矣甚  
者發蘇氏祖塋襲殺知縣張仕毅莫之誰何隆慶  
伍年春分古田征師領以原任都指揮魯國賢摘  
其尤不率化者勦之時機事頗泄賊多散遁擒斬  
三百餘人設金寶嶺大水田二堡屯兵守之首惡  
廖金濫等多匿恭荔賊巢不能得未幾復回結聚  
日與堡兵爲讎而兵目復多虛冒棄金寶嶺併守  
大水田堡賊心寔玩萬曆元年秋古田賊常猥要

叛金盪等乘機起夜圍大水田堡哨守千戶章繼宗率兵禦之不克繼宗被傷死賊益肆剽掠陽朔村落爲之騷然臨桂西南鄉諸獍多附之者總兵官李錫督募兵擊之俘斬二十餘人奪繪龍黃衣一賊稍却合荔浦永福諸賊互爲聲援時大舉懷遠師官兵將集境上錫曰此腹心之疾宜輟西師先勦近賊諸司議者亦曰遠之可憂未若近之可憂也李君議是都御史郭應聘徐應之曰懷遠討賊奉有

明旨若令盡銳於此則難復事於彼上年雨雪連旬  
不足鑒乎當更圖之乃移田州向武都康兵萬餘  
人以備省城爲名分屯近地伺之日警主兵者行  
旣數日聘與按察使吳一介右叅政鄭茂謀曰陽  
未密邇省城輟西師以專事於此固不可然緩之  
亦非計今諸賊聞主帥西行必不吾備度見在土  
兵及募士可萬人乘其不意擊之何如介等曰用  
守之名行勦之實於策誠便聘遂會提督殷都御  
史正茂以陽求二師俱屬介監督而先事陽朔介

乃圖地形較兵力分爲四道以都指揮汪可大領  
田州兵一千五百人募兵六百人由羊角營進叅  
將王瑞領田州兵三千人廣兵四百人由茶溪進  
以守備康仁領都康兵九百人三鎮兵六百人由  
黃源隘進以守備凌文明領向武兵一千六百人  
募兵五百人由陽朔縣進又檄叅將王承恩領向  
武兵二千人屯荔浦防其潰逸相機並進今旣定  
以萬曆二年正月初六日師會于金寶嶺大破碎  
江古隘岩塘涼境廟門徭山諸巢賊勢潰竄匿崖



谷間官兵乘勝追擊盡獲之俘斬凡一千二百五十有奇首賊廖金濫廖金蓋常狼相莫伯雍王朝解等皆授首惟常明珣逋誅知縣鍾昌樞其餘黨降之珣猶匿不出陰蓄異志諸僮潛謂人曰珣寔罪魁得保首領完妻孥倡逆者何所示警且恐異日復爲吾累也典史周廷宰聞之以白介介受宰計擒之磔于市諸僮帖然悔懼遣子就社學者十有九人昌擇生員朱景傳訓之僮童漸習官語知揖拜云復用介議設復金寶嶺總堡一戍土兵五

百人遇龍翠屏傘山各堡一戍兵一百人自是臨陽諸邑村閭爲之按堵矣

平永福邊山

永福距桂林百里許右江襟喉也縣有龍門只泥海灣總甫四隘蘭麻理定新安欖灘牛擺五堡皆逼近古田鳳凰古底諸巢迤西爲洛容由理定而南通于脩荔

國初招徕耕種與民雜居嘉靖初胡北獍猖熾殺逐諸徭有其地而上下邊山里尤爲窟穴與古田山

徑聯絡動相煽誘剽掠臨桂西南諸鄉及理定江  
道官民病之隆慶五年大征古田議者謂邊山爲  
古田門戶非並勦之無以鋤禍根殷都御史正茂  
曰古田之師以聲罪也鼠竊之輩能盡殄乎姑伺  
其變圖之古田平邊山諸賊亦頗帖息萬曆元年  
秋韋狼要叛邊山龍溪沙羅諸巢並起應之處海  
灣爲江道患潛越理定堡殺傷官兵右江水陸道  
路爲之梗澁尋復與上宋托定賊襲殺洛容縣典  
史奪其印信勢張甚時懷遠兵已報破賊陽朔巢

亦破諸賊始懼奔上宋潮水巢留其半守廬舍積  
聚以訶官兵動靜參將門崇文請及其未逸撤陽  
朔兵剿之都御史郭應聘與按察使吳一介謀曰  
陽朔兵不及萬且疲矣二永巢穴猶之常山蛇然  
舉邊山則潮水諸巢皆應之可易言乎介曰誠如  
公算未幾懷遠師竣聘會提督殷都御史正茂檄  
總兵官李錫移鎮安龍英奉議江州忠州諸兵協  
以田州向武兵分爲五路以參將門崇文統督守  
備凌文明康仁指揮林廷傑千戶朱冕何應秋周

學陳淮分領之先是介慮賊勁密遣把總李英持  
榜諭之賊弛不爲備及兵進連破海灣白竹黃累  
思位諸巢無不披靡介又以黃源六斗巢峭險未  
易猝拔約諸路兵以夜趨其穴擊之俘馘尤衆首  
功共一千二百四十有奇以三月十五日旋師計  
自始事至訖功僅浹二旬水陸通行如故聘復謂  
介曰永福右江之衝非諸路比諸藥難馴易亂安  
保其終不及今爲水陸備非長慮也介曰公之心  
介識之矣遂議葺永福理定二城設邊山陂角各

堡一屯兵五百人海灣堡一屯兵二百人覈賊遺  
間田得一萬二千一百餘畝給兵且耕且守復於  
永福理定各設哨船一十五隻船各兵七人分番  
有期遞送有界至牛擺堡而下屬之右江亦於桂  
灘設哨船十隻船各兵八人各以衛所官一員統  
之往來哨護以爲常云

論曰陽永之患皆始於里民招徠爲佃久之蔓延  
充斥不可羈縻而豪猾之徒又從之以徠爲利入  
其私租不共官賦少不當意動以賊占爲辭訴訐

追呼積成讎釁馴致劫奪報復地方之事日多矣  
臨桂西南諸鄉其患胥坐此今征勦之後一時夷  
類稍知嚮風而里民之害猶未已或脅理舊讎或  
責償宿負或利其禾畜而怵以再征之言或匿其  
貨賄而誘以撤堡之議其釀禍類如此蠢然易動  
可盡責之狐豕者流哉司疆隅之寄者外飭兵防  
內戢奸宄庶幾於銷萌保泰之道矣

撫勦十寨

十寨即舊八寨曰思吉曰周安曰古卯曰古蓬曰

古鉢曰都者曰羅墨曰剝丁後益以龍哈布咬爲  
十馬其地東連柳州三都皂嶺北四諸峒西連東  
蘭等州及夷江諸峒南連思恩及賓州上林銅盤  
淥毛諸峒北連慶遠忻城東歐八僊諸峒周環約  
五百里故遷江八土所屯上林循業撫安二里民  
地占據日久寨各千餘人四山紆合絕壑幽習以  
地險甲右江習猛怙強最悍難制嘉靖七年王新  
建伯守仁思田師還率新附之衆擣之襲殺二千  
四百餘級不數年猖獗如故隆慶四年殷都御史



正茂奉

命征古田

天威所臨羣夷震聳八寨尤懷疑懼賈人蕭紳久貿  
販寨中善機警熟險阨正茂多方誘之令齎文告  
往諭諸寨酋謹諄投見請官坐鎮願輸糧給兵食  
下諸司議聘時爲左蔭使議遣賓州知州吳泉撫  
之擇思恩所部那馬司巡檢黃賜興隆司巡檢常  
觀安定司頭目黃昌分鎮之議者有欲開設州治  
以賜統領者有欲設二土州者聘曰夷性未馴遽

設州治其誰與守賜一土巡檢耳授之州太驟惟  
龍哈唏咳獷悍甚不可不爲控制其立長官司一  
土巡司二分轄之便正茂是之疏

請以賜爲長官司司部兵六百人專轄八寨觀以原職  
昌以冠帶土舍各部兵二百人分轄龍哈唏咳諸  
寨歲輸銀千七十有奇聽土官照所轄地徵發復  
以思田守備移黃村調度紳充冠帶千總往來宣  
諭諸夷酋憚我兵威帖然聽命及聘繼正茂爲都  
御史檄兵備副使沈子木平量衡置簿籍禁虐取

時呼集各峒長親問疾苦以通其情一時稍戢萬曆二年龍哈撞樊尚先與古田賊同劫司帑攻縣治自知罪在不赦糾黨二百餘嘯聚山谷間抗官逋賦子木言尚疑畏跳梁亟宜殲滅第諸寨新受約束如以兵往無濫及乎聘乃密示子木令三寨土司選勁卒夜襲之斬尚及其子第九十四人獲原劫僧道司二印記而還餘黨悉行解散越數月土舍昌及其子東周帥所部兵徵寨糧倍其賦至淫及婦女諸獗恚甚復糾黨邀擊昌時昌以所善

峒老石茶得脫東周死馬聘聞之馳檄撫諭暴昌  
之罪而械治之其亂遂息萬曆三年冬聘擢戶部  
右侍郎其後土司弱不能支犬羊之性益以驕恣  
攻逐賜子如金等退劄三里殺占上林七里武緣  
五圖剗馬長弩橫行四出七年張都御史任會總  
督劉侍郎堯誨顧御史鈐請征之

詔許出師務在滅賊安民以稱塞

德意先期調募土漢兵十萬分四部思恩叅將李應  
祥由三里進副使陳俊監之柳慶叅將倪中化由

忻城進叅議姜忻監之永寧叅將干嵩由夷江進  
副使侯國治監之潯梧叅將張榜由上林進叅議  
李一迪監之總督四部者征蠻將軍王尚文而理  
餉紀功則叅政彭文質副使周舜岳也堯誨移駐  
蒼梧合謀調度益以驍卒三營軍費萬緡戎器無  
算師克在和謀全在豫我已得勝算矣以冬十二  
月二十日誓師各部分道竝進賊設險拒敵我師  
賊鼓深入直搗諸巢兵氣霆震前無生寇矣又以  
北五諸聚落習與賊通移師擊之悉平以三月三

日班師擒斬凡九千一百三級俘獲五千四百七十有奇殪死焚溺死者不與焉捷

聞告

郊

廟文武將吏陞賞有差皆異數也是時御史鈐以憂去代者爲胡御史宥任會總督堯誨御史宥上善後事宜設三鎮以重彈壓一屯三里以樹聲援二分信地以重責成三遷衛所以振武威四議屯田以示優卹五開道路以通險阻六議錢糧以裕

經費七

上俞之干戈甫戢經畫伊始都御史任無祿 奏上  
上方厯善後之思會聘襄先太淑人丘壟告成事  
制召聘改兵部右侍郎再撫粵西趣之官聘奉

詔兼程至端州會堯誨商榷當否靡不協于一遂以  
九年正月朔至桂林行兵備副使劉世賞叅議彭  
應時司其綱領同知鄭一濂主清理田土通判胡  
中王建拓鎮城已二官以他故罷去乃以同知吳  
譽聞通判賈德卿知州饒敬承先後分督之諸吏

士日勤所事駸駸就厥緒無何應祥推松潘副總  
兵聘會疏言於

上其畧曰用兵之道善後爲急得人爲難而習夷情  
當利害者尤不多得應祥倡議討賊勞苦功高今  
地方甫定彈壓攸資易將領非計也請改陞副總  
兵仍管思恩叅將事

制曰可設鎮三周安古卯爲一鎮思吉古鉢羅墨爲  
一鎮古蓬都者剝丁爲一鎮鎮各建城雉堞一新  
鼎足竝峙以土官族日常應鰲常顯能黃馮各授



土巡檢職銜部兵千人携家世守其地仍隸賓州以思恩叅將統轄之而叅將衙門則建於三里城規制悉從開拓龍哈哱咳各築左右堡募兵各百五十名防守遷南丹衛八所附叅將共一城而居徙官軍舍餘三百九十六名以實邊地遠近碁置隱然一長城也叅將領標兵一營屯劄三里無事則守信地有警則應聲援其道路則開辟四達東有琴水路車二堡龍哈等六營西有哱咳良舉等有五營北有羅墨高陽等六堡皆劄鑿山石砍伐林

菁以通往來自賓州由三里達慶遠計程止四日  
設公館五凡官使廩食夫馬分屬之賓州上林宜  
山忻城四州縣供應行旅止宿各有依託其土田  
則核實給贍以八寨田給三鎮官兵以龍哈哱咳  
熟田二萬七千九百五十五畝并李佛嶺以北屬  
南丹衛爲新屯原坐水南等處爲舊屯黃村一帶  
上林舊民耕種者給上林爲民業間稍變通前議  
以順軍民之情從其便也三鎮田候四年後照冊  
載子粒米三百六十四石量徵三分之一南丹田

各給五十畝爲一屯歲入子粒米六石凡三千三百五十四石六斗候三年後全徵以給官軍俸糧而各寨遺孽穿竄草石者尚多旣待之不死不令得所將貽後日憂聘仰體

天子好生之仁責將吏而下多方撫戢各給田畷以耕而隸之三鎮自是十寨内外耒耜相望矣諸所經費雖草創之初務恢規畫而綜理之密具有司存視先

題初年所用錢穀稍從節縮收永逸於一勞償久安

於暫費其謂茲乎是役也賴

主上威靈諸執事勤力底有成績聘唯遵

廟算協督臣圖惟終事以毋負

明詔而已隨會劉侍郎堯誨李御史東以竣事報諸  
將吏復蒙

上賞云

論曰十寨怙強負固自干天誅久矣隆慶中有先  
處古田隨圖八寨之

詔此

廟畧也柔則撫之叛則懲之古馭夷類如此粵自古  
田立三鎮得以夷治夷之法諸鄉落按堵如故豈  
非其明効大驗哉古田附省城疾苦易聞耳目易  
及乃其後猶有常狼婁者故轍可鑒也今十寨遠  
矣是在監司守帥加之意耳母縱土司倍克母容  
姦人扇惑母任其冒糗糈而空吾壘母因其就絳  
縹而弛吾防雖百年亡患可也然非獨十寨爲然  
矣

擒黃賢相

黃賢相者忠州土酋也父廷寶故賢相嗣立廷寶弟廷器興兵謀殺賢相奪其官印總督林都御史富檄叅議鄭惟新左叅將佾縉督兵討廷器斬之賢相得治州事稍長酗虐無度久益驕恣先是有四崗者介于南寧思明忠江兩州之間思明忠州屢肆占奪騷及旁境嘉靖十八年副使翁萬達議白督府改崗名四都隸南寧地方稍定隆慶二年冬思明府土官黃承祖奏取四都地事下督府議賢相遂爭之勒都民投見啖以劍馬犒以牛酒擅

立總管諸名目分兵數千守其地縱令剽掠村落  
焚蕩室廬爲禍甚烈賢相復詐爲都民上狀曰民  
心思附本州如商民避紂盡歸西伯請自部千兵  
詣軍門求理蓋脅之也南寧人情洶洶告變聘時  
爲藩使又南寧舊守也民爭訴之會兵備僉事譚  
惟鼎入賀還爲聘謀曰是安可已乎顧廣中方有  
海上之役如何聘曰兵非得已而用之也此酋恣  
暴逾三十年州氓憤而思叛久矣余所稔知此殆  
可以間取者惟鼎深然之至郡卽奏記列賢相罪

狀畧曰賢相絞母弑叔殺弟戕妻悖天逆倫屠戮  
無算而且征調不赴例馬不貢

表箋不進向未及一正其辜者誠獸畜之也今復據  
地縱掠冒犯

天憲作孽之勢如火方燃俟其燎原撲之晚矣願假  
便宜圖之否則勢必加兵無養亂爲也總督劉都  
御史燾許之永康縣典史李材者時署遷隆寨巡  
檢司事隣於忠州也惟昂知其人有謀召與語屬  
之以寨人覃惠內及材子夢辰潛入州中數往來



貿易盡得其親近狀懸重賞間之其部下頭目傲  
思蒙裕輩苦賢相殘虐願爲內應材遂言於惟昂  
請以兵隨直入州治逮之旣至諸頭目果多解體  
惟內兵黃中秀等在左右賢相督之拒敵官兵少  
却被傷八十五人材被鎗左肋惟昂悔之廼更爲  
文告諭賢相曰敵傷官兵皆黃中秀等之罪也爾  
其縛解之猶足自贖又密示州目部氓曰賢相罪  
在不宥軍門將以大兵進爾輩無噍類矣得賢相  
諸人可悉寘不問也材復以覃惠內入與蒙裕多

方設間令官目互相猜惑賢相勢寢孤惟昺復密  
爲手書諭二十四村及四寨頭日程秀等潛出投  
謁厚犒之令號召鄉兵擒獻賢相諸所蓄積金穀  
器物悉聽自取秀等唯唯已復申嚴旁近諸州崗  
絕其聲援而遷隆崗土官黃一元者素善賢相且  
與比隣惟昺度賢相有急必依一元責之尤謹計  
旣定惟昺密令材與夢辰齎執旗牌約蒙裕等集  
談州各村寨民兵三千有奇夜屯于剝埋墟平明  
爲官兵旗幟擁進近地內兵遙望之以爲真官兵

至也爭取財寶馬匹四散遁去賢相勢窮挈印奔  
四寨四寨村老就賢相語曰官家建主甚急當詣  
官聽理賢相欷歔泣下曰汝衆同官家暗計害我  
四面網羅我無生路矣自取孔雀血入酒飲不死  
材督諸鄉兵追至會黃一元兵亦至遂擒賢相黃  
中秀及州印解惟鼎時三年九月也惟鼎當論功  
獎賞有差檄推官劉潔知縣徐宗靜及李材入州  
坐鎮撫循兵民立陳光蒙裕傲思等爲總州管兵  
名目部領其衆以督備指揮吳世勳還鎮四都都

民復業如故賢相斃于獄督府以

聞奉

旨燾賞銀三十兩紵絲二表裏惟鼎賞銀二十兩一  
表裏李材陞三級爲本縣主簿州目蒙裕等及南  
寧民何元朴等俱請如思恩上思左州例改立流  
官惟鼎白之督府無何蒙裕復言曰賢相三子尚  
在州民意向未一或懷嬰白之義或起狐兔之悲  
願順州民仍立賢相後惟鼎尋爲書報燾曰考之  
往牒思恩上思左州諸地更革之後叛者四起至

數十年爭戰始休田州改流官不二年盧蘇之亂  
旋作是前事不忘後事之鑑也賢相已殺其長子  
有命及女二人矣今惟三子在曰有瀚有澗有誥  
皆蒙裕輩收鞠之而三子之母亦已爲賢相所殺  
其子嘗語人曰父不死吾兄弟未必俱生誠立之  
知以爲德而不以爲怨也况族屬目民逋逃尚衆  
其心曷嘗一日忘黃氏哉請降州爲縣隸南寧府  
立有瀚嗣之第有瀚方穉遽歸之印恐起攘竊者  
心仍委督備官一員代爲之理於計誠便官族黃

元探亦詣督府告曰賢相之罪誠不容誅然皆蒙  
裕等誘之也乞立孤以存黃氏祀燾胥疑之乃遣  
指揮李炳往與李材同鎮忠州檄惟鼎解州印及  
有瀚元探蒙裕等赴督府審處惟鼎復爲書報曰  
黃元探者先年爭襲作亂廷噐子也蒙裕者計擒  
賢相有功人也今元探請存孤而陰許蒙裕其情  
叵測聞元探集勁黨百人取道先發恐將不利於  
孺子及蒙裕諸人願熟察之無墮奸謀令有功者  
阻喪爲兩江土酋竊笑迺令推官劉潔偕李柄鮮

至督府時燾以謁告將發復令劉潔等勘報州印  
給有瀚有瀚穉弱爲炳輩所誑以印質廣城宦族  
得金若干兩糜費殆盡燾檄下惟鼎曰賢相監故  
已足正法有瀚宜還襲州事以安羣情惟鼎得檄  
拂然曰噫徒爲諸奸地耳未幾以疾卒兩廣巡按  
御史趙焯李良臣交章論其事

詔下兩省勘鞫炳等各抵罪以有瀚尚幼仍委官坐  
鎮其地云

擒黃金彪

黃金彪者羅陽土酋黃昂子也昂老以縣事屬彪彪性兇悍多爲不法黨合木旻賊魁陳嵩李珠長沙賊魁吳蕩鍾太等肆行剽劫旁近州邑居民橫被荼毒殺傷無算掠牛馬以數千計支解太平生員程之宋及其義子王保左州思同宣化諸官民告變無虛日是時兵備官缺署事者奪於他政隆慶伍年春僉事霍與瑕來任督撫檄允數十下與瑕就聘計之聘曰彪雖惡其勢力非賢相埒也能如譚君以計收之乎與瑕是之行部至郡廉得其



狀乃言於督撫曰金彪稔惡有年必誅之寇也顧  
黨與其繁遽加之兵恐一煽百起未易猝滅願徐  
圖之乃招兵訓武陽爲備禦計分遣指揮吳世勳  
鎮撫朱麒緝陳嵩李旺吳蕩吳屯等補之羣黨稍  
稍駭散已復檄諭昂及其子金鯨曰彪之暴虐寔  
昂縱之鯨輔之也能擒彪以贖罪止彪爾否則禍  
將連及悔之晚矣昂懼執白沙四村從賊黃父勇  
等六名以獻主簿李材言曰彪之恃四村猶虎之  
有翼也四村心離彪無能爲矣願以文告往諭之

至四村四村人曰彪父子真狼虎也緩則吾黨急則吾讎吾恨不殲殺之敢復附之與官軍抗耶昂知勢孤請還彪所掠左州牛百頭歲出兵二百名戍南寧以贖彪罪與瑕不聽購之愈急一日昂奔與瑕懇曰男彪不道甘爲盜蹶以禍地方小人禽犢之情未忍遽縛以獻不謂彪之疑而反噬也已殺金鯨且將及昂矣請急擊勿失不則釀成大患昂百死不足贖矣與瑕復聲其殺弟逐父罪請於督撫及其爲謀未成衆心未協擊之庶其脆易破

其萌牙易拆也督撫許之與瑕先檄示諸土官巡  
司遏截關隘防其逸徑遂召集諸路兵遣指揮鹿  
鳴周武緣令楊大韶及李材等分部進至羅陽相  
機取之時彪黨數百見官兵猝至一時散走號召  
白沙四村無有應者彪倉惶無措率其親黨數十  
人奔隴悶白面山箐中官兵環索之凡五日不獲  
與瑕以兵屯久恐爲縣民擾生他變諭令旋師以  
李材率勁兵百人留其地徐爲之計材訶彪妻子  
所在先執之不數日彪食盡令其黨黃盧黃綱林

清黃瑞黃名許順黃凌黃堆及闖人農全黃材潛  
回轉糧俱被官兵擒獲彪援絕奔大灘江欲南走  
交趾爲後圖聞官兵四路譏察復遁回山箐與瑕  
探知之作印信賞帖令李材及千戶蔡良能聞其  
叔黃鼎誘彪使歸且與之約曰汝罪無赦能悔禍  
投降當以官畀汝子母自執迷徒苦汝妻孥爲也  
彪聞諭自計勢蹙至夜分潛歸鼎泣謂鼎曰業已  
如此無所逃矣彪誠死而官府食言奈何鼎出賞  
帖示之彪復泣伏地鼎報昂會李材伏兵至遂執

之解至南寧繫于獄時五年十二月也與瑕爲書  
報提督殷都御史正茂巡撫郭都御史應聘巡按  
李御史良臣請正彪罪而許其子獄襲焉

論曰賢相金彪之惡極矣二孽不殲左江之禍未  
有已也惟鼎與瑕皆以計擒之卒消禍本二人功  
亦不細矣鼎以病終而未卒所志瑕以憂去而未  
錄其功惜哉聘與聞始末者之以告後來者云

建州新寧

新寧州者武黎華陽沙水吳從四都地也四都自

改隸南寧歲委指揮一員督備其地隆慶三年忠  
州土酋黃賢相謀據之左江大駭及賢相擒議者  
謂非建設文吏無以固都氓心而南寧諸武弁往  
往以勞民爲辭陰阻撓之議久未決五年秋知府  
林喬相議曰四都之民雖隸南寧寔則叛服不常  
固土酋煽惑致然亦由督備武人撫馭無術如錢  
應龍輩索賂激變可鑒也宜及此時設文吏撫治  
之用夏變夷計無出此僉事霍與瑕是之覆議曰  
四都反覆者屢矣非有豪傑割據之雄山川叢峻

之險也然而數十年未靖者蓋人謀之失耳誠鎮以州城治以文吏其便有八一曰地廣足以建州二曰物力足以供官三曰建州以控太平南寧之要衝四曰建州以扼陀陵羅陽之喉咽五曰改渠樂寨土巡檢司以爲指臂六曰沒忠州所侵宣化地以爲附益七曰築土城以省民力採山木以建官署八曰分拆宣化如禾三畝以屬四都勞而不怨惠而不費於計誠便藩臬諸司僉議曰可巡撫都御史郭應聘會總督殷都御史正茂巡按李御

史良臣爲書上曰四都者在南寧太平爲必守之  
地在思明忠州爲構亂之階頃緣督備匪人都民  
携貳黃賢相乘之煽惑衆心侵掠境土幾爲左江  
大患徼藉

天威士酋就縛乘此事幾設州置吏經畧之上計也  
蓋州治一立則官有常政民有定主以絕思明忠  
州覬覦之心而爭端可息以控南寧太平之衝而  
上下舟楫可恃無虞以扼羅陽陀陵之要害而白  
沙渠黎諸賊不敢逸出爲患一州之立屹然爲左



江巨鎮其關繫非淺鮮請如諸臣議

詔從之與州名新寧降給印信銓知州鄧林材吏目  
鄭麟各一員割宣化如禾三畝及沒忠州侵地那  
投一十五村隸焉與瑕乃詣其地相度州治卜吉  
於沙水都之定祿岡及經營城垣廨舍盡覈諸屬  
邑之錢穀貨稅驛遞之浮羨以佐創造諸費會與  
瑕以憂去同知法體偕林材議甃土城以甃參議  
高則益僉事高克謙知府杜思先後督理之至萬  
曆二年春始告成巡按唐御史鍊行部至江林

材請曰人性一也夷風之未變者其文教之未敷  
乎今建州域民漸同內地興學校以明禮義易椎  
髻以尚衣冠導民者責也敢以爲請參議高則益  
會提學僉事江圻僉是其議白之御史御史會正  
茂及聘復爲書上曰善治者不擇地善教者不易  
民今州之童子可與進者三十人未可以夷鄙之  
也建學立師茲惟其時疏入

詔設儒學學正一員董教事今新寧浸浸爲聲教地  
云

論曰四都扼左江上游太平之襟喉南寧之屏蔽也四都不州則其地其民終非南寧有左江之民其有寧宇乎是役也銷彌禍本賢於十萬之師矣顧搜剔冗濫以充營構之需與瑕竟被浮言任事之難信哉